

'Sëedhε -blεεzë 'ö
Zan
-ya bɔ -Zlan -bha mε -nu -dhë 'ö =nε

-Wo 'ö -kë -a 'gü -sü nu mε -dhë

¹ Mε 'ö =toëpö -këdhösü -wo 'ka, 'ö -kë -dhö pë 'plε züdüyi 'ka bhë =nε 'ö 'yi 'wun -gban -a -bha 'sëedhε =nε -a 'gü, 'yi- bɔ ka -dhë; yi- -wo -ma, 'ö yi 'yan -yö -dɔ -a -bha, 'ö -kë yi -bha -ga -pë -së 'ka. 'Ö 'yi yi -kɔ -nu pa -a 'ka. ² Mε 'ö bhë, =dhε 'ö nu, yi- -yö; -yö -kë kwa Dë 'piö -be; 'kεε =ya yö -dhεgbεadhε 'gü yi -dhë. Yö =nε 'yi 'wun -gban -a -bha 'yi- =blεε ka -dhë. ³ Yö 'ö yi 'yan -yö dɔ -a -bha, 'yi- -wo ma bhë =nε 'yi- -wun =blεε' -na ka -dhë 'pö bhë, -yö kë 'dhö -kë 'kou -sü 'ö yi -gɔ bhë, 'kaan- -da yi 'piö, 'kwaan- kaa kwa Dë (-Zlan) waa- ö Gbö Yesu Klito -an 'piö. ⁴ 'Sëedhε =nε, yi- -bɔ ka -dhë 'dhö kö 'gludhi 'ö kwa -gɔ bhë, -yaan -mɔ 'kuë.

-Zlan -bha -kë -dhεpuudhε 'ka -sü

⁵ Mε 'yi 'wun -gban -a -bha bhë 'ö tɔɔ Yesu Klito. -Naɔ 'ö yi -gɔ ka -bha 'ka 'ö go -a 'dhi 'ö tɔɔ: -Zlan =nε 'ö tɔɔ -dhεpuudhε; bhii -dhεtiidhε 'gü -wun yaa gbε 'yaa- 'gü. ⁶ =Ya kë =nε 'kwa- pö kwa -nu kwa kwa 'kou, 'kεε kö kwa 'ta -sü -na 'wun yaa 'gbloo 'piö kö =sua 'kwa- kë 'ö 'kwaä pë -nu kë 'wun gia- 'gü. ⁷ 'Kεε =ya kë =nε 'kwa 'ta 'sü -dhεpuudhε 'gü =nε -kɔ 'ö -Zlan -de gia- 'ö- 'ka -dhεpuudhε 'gü -a 'dhö, kö mε -nu 'ö 'kwa bhë, -kë do -sü -yö kwa ziën 'ö Yesu Klito 'ö- Gbö 'ka bhë 'ö- fëi =ya kwa 'zlu =sɔɔn yaa 'plε -gɔ.

⁸ =Ya kë =nε 'kwa- pö 'kwaä =sɔɔn yaa kë, kö kwa -de -püö 'kwa- wo; kö 'wun gia- 'yaa kwa 'gü. ⁹ 'Kεε =ya kë

=zian' =nɛ 'kwa kwa -bha =sɔɔn yaa -nu -wun =blɛɛ' - Zlan -dhë, kwa -mɔa 'kwa kwa -zo yö -a -bha bhii -yö kpengdhö; -yö -dho ziö kwa -bha =sɔɔn yaa -nu -ta, 'ö dho kwa kë 'puu 'wun yaa 'saadhö -gɔ. ¹⁰=Ya kë 'zü =nɛ 'kwa- pö kwaa =sɔɔn yaa kë, kö 'kwa -Zlan kë =suame 'ka. =Ya kë 'dhö kö -a -wo 'yaa kwa 'gü =nɛ bhë.

2

Klito -bha -nu kwa -dhë -sü

¹ Ma 'në -nu, 'sëedhɛ =nɛ a- bɔ ka -dhë 'dhö kö =kun 'ö 'ka dho =sɔɔn yaa kë gbɔ. 'Kɛɛ =ya kë =nɛ mɛ 'bhaa =ya =sɔɔn yaa kë, kö -yö kë -a 'yaan =nɛ kwa -bha 'wun -faan 'sü -mɛ do -yö -dhö kwa Dë -Zlan 'piö; yö =nɛ tɔɔ Yesu Klito, 'ö mɛ kpengdhö 'ka. ² Bhii -yö -kë slapë 'ka kwa =zian' dhö -yö kë 'dhö kö -Zlan -yaan ziö kwa -bha =sɔɔn yaa -nu -ta. 'Kɛɛ kë- wo 'dhö bhë kwa -de 'sloo 'kwaa -mü, mɛ 'kpekpe -bha =sɔɔn yaa -wun -mü.

³ Pë 'ö- -zɔn =nɛ kwa -Zlan dɔ 'ö tɔɔ kwa 'wun ma -a -bha tɔng -nu -ta. ⁴ 'Kɛɛ mɛ 'bhaa =yaa- pö ö -Zlan -dɔ 'kɛɛ kö 'yaa 'wun ma -a -bha tɔng -nu -ta, kö =suakëme -mü -a 'ka; 'wun gia- 'yaa- 'gü. ⁵ Mɛ =ya 'wun ma -a -wo -ta kö mɛ bhë -dho 'ö- 'gü -Zlan -bha 'ka bhë -yö 'kpedhö.

-Kɔ 'kwa dho -a kaa kö 'kwaan- =tɛi' dɔ =nɛ kwa -klu -sü 'ka -Zlan -bha bhë 'ö =nɛ; ⁶ Mɛ 'ö- pö 'ö -klu -sü 'ka -Zlan -bha bhë, kö -a 'ta -sü -kɔ -yö kë =nɛ -kɔ 'ö Yesu -yö -tosiadhe =kaa' zö bhë -a 'dhö.

'Wun 'ö -gban tɔng -dëü -bha

⁷ N dhegluzë -nu, tɔng 'ö bhë 'yaa tɔng -dëü 'a- bɔ ka -dhë -a 'ka, 'kɛɛ tɔng zii do 'ö nu ka -dhë -a züdüyi 'ka bhë yö -mü. Tɔng zii bhë ('ö tɔɔ: -Bhö ü -ya 'yɔɔ -dho kë =nɛ ü -de 'dhö, 'ö) 'ka- ma do. ⁸ 'Kɛɛ -yö tɔng -dëü 'a- ya, 'a- bɔ ka -dhë -a 'ka; -yö 'wun gia- 'ka Klito -bha 'ka, 'ö

ka -bha 'ka 'pö; bhii -dhɛtiidhɛ -yö ziö -na; -dhɛpuudhɛ giagia =ya yö 'bhü -sü -bha 'saadhö.

⁹ Mɛ 'ö- pö ö -dhɛpuudhɛ 'gü 'kɛɛ kö -yö -ya -sü 'ka ö dheglu -san 'ka, kö -yö =tun 'wun yaa 'gü. ¹⁰ Mɛ 'ö- dhɔ -kë ö dheglu 'ka, kö -yö -dhɛpuudhɛ 'gü; =ya kë 'dhö zlöö kö pë 'ö dho kë -a -bha -püö =sɔɔn yaa 'gü -gɛn 'ka 'yaa -dhö gbɔ. ¹¹ 'Kɛɛ mɛ 'ö -ya -sü 'ka ö dheglu -san 'ka kö -yö -dhɛtiidhɛ 'gü; -yö 'ta 'sü -na -dhɛtiidhɛ 'gü 'ö 'yaa ö 'dhodhɛ dɔ bhii -a 'yaa -dhɛ yö -dhɛ bhë -a 'gü.

¹² Ma 'në -nu, 'ka -zo -yö Klito -bha -sü 'gü, 'sëedhɛ =nɛ a- -bɔ ka -dhë 'dhö bhii 'ka bɔ Klito 'ka; =ya ziö ka -bha =sɔɔn yaa -nu -ta. ¹³ Mɛ 'ka mɛ ziizii -nu 'ka Klito 'gü, 'sëedhɛ =nɛ a- -bɔ ka -dhë bhii mɛ 'ö -kë -dhö pë 'plɛ züdüyi 'dhiö bhë, ka- -dɔ. Mɛ -nu 'ka -dadhëü -nu 'ka 'pö, a- -bɔ ka -dhë bhii 'ka 'to -a 'gbee- 'ka dü -ta.

¹⁴ =ɛɛ, 'në -nu, 'sëedhɛ =nɛ a- -bɔ ka -dhë 'dhö 'ö tɔɔ ka kwa Dë -dɔ. Mɛ ziizii -nu, a- -bɔ ka -dhë bhii mɛ 'ö -kë -dhö pë 'plɛ züdüyi 'dhiö bhë, ka- -dɔ. -Dadhëü -nu, a- -bɔ ka -dhë 'ö tɔɔ ka 'gü -yö 'gbee-, yö =ga 'ka toë- 'gbee- 'ka dü -ta bhë; bhii -Zlan -wo -yö ka 'gü.

¹⁵ Kö =kun 'ka 'kpongtaadhɛ waa- ö 'gü -pë -nu -dhɔ -kë! Bhii 'ö tɔɔ =ya kë =nɛ mɛ =ya 'kpongtaadhɛ -dhɔ kë kö -Zlan -dhɔ 'yaa- 'gü 'gbönggböng. ¹⁶ Pë -nu 'wo 'kpongtaapë -nu 'ka, 'wo -kë mɛbheedhɛ =dhɔɔbhaapë -nu yaa, 'ö mɛ 'yan -yö -da -a 'gü -a -dhɔ kë -sü waa- -de -sü =va -sü 'kpongtaapë -nu -bha -kë mɛ -gɔ -sü -wun 'gü bhë, waa 'go kwa Dë (-Zlan) 'piö, 'kɛɛ -wo -go 'kpongtaa zö. ¹⁷ Mɛ 'ka =nɛ, 'kpongtaadhɛ -yö ziö -na -ɔɔ. Pë -nu 'wo 'kpongtaa 'wo mɛbheedhɛ -dhë -së -wo ziö -na 'pö. 'Kɛɛ mɛ 'ö -Zlan -zo 'kun -wun -kë -yö -dho kë -dhö =toëpö 'ka.

'Wun 'ö -gban Klito yaagüme -bha

¹⁸ Ma 'në -nu, 'töng -kaanta =ya yö =klöö! Pë 'ka- ma -be 'ö tɔɔ Klito yaagüme -dhö nu; 'yö dɔ 'kwa- wo =dɛɛ =nɛ

Klito yaagüme -nu =wa nu =va; =ya kë 'dhö, kö =ya kë kwa 'yaan =ne 'töng -kaanta 'wo =weé' bhë =ya yö =klöö'. ¹⁹ Me -nu 'wo bhë, -wo -kë kwa 'piö -be; 'kë kë 'ö waa- wo kwa -bha me giagia 'ka bhë =ne 'ö 'wo go -a -dhë kwa ziën bhë, 'yaa 'pö -wo -dho to kwa ziën -bezë; 'kë -wo -go kwa ziën 'dhö kö -yö kë kwa 'yaan =ne me 'ple 'waa kwa -bha me giagia 'ka.

²⁰ =Ya 'to me -nu 'ka to ka -bha, -Zuu 'slööslö 'ö Klito -yö ka gbaa bhë 'ka- yö. =Ya kë 'dhö kö ka 'ple 'ka 'wun giadö. ²¹ Kö 'sëedhe 'ö =ne, n 'ka- bö =ne 'waa 'wun giadö bhë -a -pë 'dhö. -A dö -de 'pö 'ka- wo bhë =ne 'ö 'sëedhe =ne 'a- bö ka -dhë -a -wun 'gü bhë. Ka- =tei' -dö 'pö =ne =sua -wun yaa -mōa -yö 'go 'wun giagü.

²² =Suakëme bhë, yö =ne töc me 'ö =kploo Yesu -bha -kë Klito Medhamë 'ka -sü -wun 'ka; yö =ne töc Klito yaagüme 'ö =kploo -na kwa Dë (-Zlan) waa- -a Gbö -an 'ka bhë. ²³ -Yö kë ka 'yaan =ne, me 'oo me 'ö =kploo -na -Zlan Gbö 'ka bhë kö =ya =kploo kwa Dë -Zlan -de giagü 'ka 'pö. 'Ö me 'ö -Zlan Gbö -wun -dhe 'wun giagü kö =ya kwa Dë -wun -dhe 'wun giagü =ne bhë.

²⁴ -A -wun 'gü, 'wun 'ö 'ka- ma -a züdöyi 'ka bhë, -kaa -wun kuënnu -së 'ka ka =zuö' 'piö; =ya kë 'dhö kaa- -Zlan Gbö waa- kwa Dë (-Zlan) ka -dho to ka 'kou. ²⁵ Pë 'ö Klito -ya 'tö go kwa -dhë =ne ö -dhö -a nu kwa -dhë bhë 'ö töc =toëpö -këdhösü.

²⁶ 'Wun 'ö -gban Klito yaagüme -bha bhë, a- =bëen, 'a- bö ka -dhë me -nu 'wo- 'piö 'wo ka bho zian -ta bhë -an -wun 'gü. ²⁷ Ka -bha 'ka, -Zuu 'slööslö 'ö Klito -yö ka gbaa bhë -yö ka 'gü. =Ya kë 'dhö kö ka -bha -wun 'yaa- -bha gbö kö me -yö ka -daan. Bhii -Zuu 'slööslö -yö ka -daan pë 'ple 'ka 'ö- -bha me =daan' -wo 'dhö 'wun giagü 'ka, 'yaa =suazë. Pë 'ö -kë 'ö 'ka dho 'wun ma -Zuu ('slööslö) -bha me =daan' -wo -ta -kpa Klito -bha -sü 'gü bhë 'ö bhë.

²⁸ Ma 'në -nu, -ka 'to -klu -sü 'ka Klito -bha -yö kē 'dhö kö yi 'ö dho -wo -a 'ka bhë, -zogbandhe -yaan kē kwa -gɔ, kö =kun -kē 'ö- -bha nu -yi 'ka, 'ö lë- kpɔ kwa -ta -a 'dhiö. ²⁹ Ka- =tɛi' -dɔ =nɛ Klito -yö kpengdhö. -A -kē 'dhö -sü 'ka, -yö kē ka 'yaan =nɛ mɛ 'oo mɛ 'ö pē -nu -kē kpengdhö kö mɛ bhë -yö -go -Zlan 'gü.

3

'Wun 'ö -gban -kē -Zlan -bha 'në 'ka -sü -bha

¹ -Ka -dhɛ -ga bhë 'dhɛ! Kwa -dhɔ 'ö kwa Dë (-Zlan) -ya -kē bhë ka- -yö bhë =aa! -Wo kwa -dhɛ -Zlan -bha 'në -nu; 'ö 'kwa- -de 'ka. =Ya 'go mü, 'kpongtaamɛ -nu 'waa kwa dɔ bhë 'ö tɔɔ waa -Zlan dɔ. ² N dhegluzë -nu, dɔ 'kwa- wo =nɛ, 'kwa kē -Zlan -bha 'në -nu 'ka. 'Kɛɛ pē 'ö 'kwa dho kaa kwaa- dɔ -së 'ka =kun. -A mɛ 'ö kwa 'yaan 'ö tɔɔ: Klito =ya -wo, kwa -dho kē =nɛ -a 'dhö bhii kwa 'yan -dho -kpën -a -bha =nɛ -kɔ 'ö- 'ka bhë -a 'dhö. ³ Mɛ 'oo mɛ 'ö -ya Klito -gɔ -kɔ =suu' - 'ö bhë 'ö- wo -na -yö ö -de -kē 'slöösLö =nɛ -kɔ 'ö Yesu Klito -de gia- 'dhoë- 'ka bhë -a 'dhö.

⁴ Mɛ 'oo mɛ 'ö =sɔɔn yaa -kē kö =ya -Zlan -bha tɔng -lö 'gü, bhii =sɔɔn yaa kē -sü 'ö tɔɔ -Zlan -bha tɔng -lö 'gü -sü. ⁵ Bhii ka- =tɛi' -dɔ =nɛ Yesu Klito -yö -nu kö -yaan mɛ -nu -bha =sɔɔn yaa bho -an -bha; =sɔɔn yaa do yaa kē -a -bha. ⁶ -Yö -dho kē -së kö mɛ 'oo mɛ 'ö -klu -sü 'ka -a -bha, -yö ö bo =sɔɔn yaa kē -sü 'ka. -Kɔ do bhë -a 'ka mɛ 'oo mɛ 'ö 'dho -na =sɔɔn yaa kē -sü 'ka 'dhiö, kö -a 'yan yaa dɔ -a -bha; kö 'yaa- dɔ.

⁷ Ma 'në -nu, kö =kun 'ö mɛ gbɛ -yö ka 'bɔn -kan. Mɛ 'ö- kēwun -nu 'dho kpengdhö, kö -yö kpengdhö =nɛ -kɔ 'ö Yesu Klito gia- 'dhoë- 'ka bhë -a 'dhö. ⁸ Mɛ 'ö =sɔɔn yaa kē -na bhë kö -yö dü -bha 'ka; bhii 'go 'töng 'ö dü -yö =sɔɔn yaa zü dɔa -a -bha, yaa ö bo =sɔɔn yaa kē -sü 'ka do. 'Kɛɛ -Zlan Gbö -yö -nu kö -yaan dü këyuö -nu 'gü =siö' -.

⁹ Kö mE 'oo mE 'ö go -Zlan 'gü -yö ö -bo =sɔɔn yaa kē -sü 'ka bhii -kē -a 'gü -sü 'ö 'piigbeedhE 'ö go -Zlan 'piö 'ö 'gü bhē -ya 'gü; 'ö =dhE -kē =nE -Zlan -ya Dē 'ka bhē, -yö -dho go mü 'zü -yaan =sɔɔn yaa kē -yaan dhoë 'dhiö -kɔklē =E?
¹⁰ Pē 'ö dho -Zlan -bha 'nē -nu dɔ -a -bha dü -bha 'nē -nu ziēn =ga =nE: Mē 'oo mE 'ö 'yaa kpengdhö ö kēpē -nu 'gü 'iin 'ö 'yaa ö dheglu -dhɔ kē kö 'yaa -Zlan -bha 'nē 'ka.

-Dhɔ -kē 'kuē -sü

¹¹ 'Wun 'ö 'ka- ma -a züɔɔyi 'ka bhē 'ö tɔɔ 'kwa kwa 'ko -nu -dhɔ kē. ¹² Kō =kun 'ö 'kwa -kē =nE Kaɛn 'ö ö dheglu zē bhē -a 'dhö; bhii -yö -kē dü -bha 'ka. Pē 'ö Abelö zē -a -wun 'gü bhē 'ö tɔɔ -a -kɔ kēpē -nu bhē kē 'wo- wo ya 'ö- dheglu -bha -nu -wo kē -sē bhē. ¹³ -A -kē 'dhö -sü 'ka, dhegluzē -nu, kö =kun 'ö ka 'te -yö tun 'kpongtaame -nu -bha ka -san zē -sü -wun 'gü ('ö tɔɔ Kaɛn =suu' -nu -mü)!
¹⁴ Pē 'kwa- dɔ 'ö tɔɔ 'kwa 'go ga kwɛE 'kwa -da -kē -a 'gü -sü 'gü; bhii 'ö tɔɔ kwa dheglu -nu -dhɔ -yö kwa -kē. -A -kē 'dhö -sü 'ka mE 'ö -dhɔ 'yaa- 'gü mE gbE buëndhö bhē kö -yö =tun ga kwɛE. ¹⁵ Mē 'oo mE 'ö ö dheglu -san zē bhē kö mɛzēmE -mü -a 'ka; 'ö ka gia- 'ka- =tɛi' dɔ =nE =toëpö -kēdhösü 'yaa mɛzēmE -bha 'ka. ¹⁶ -Dhɔ 'ö bhē -kɔ 'ö 'kwa- dɔ -a -bha =ga =nE: Yesu Klito 'ö bhē -yö ö -de -nu kwa -wun 'gü; kö kwa -de 'pö, kwa =dua' -mü kö 'kwa kwa -de nu kwa dheglu -nu -wun 'gü 'sa. ¹⁷ =Ya kē =nE =bhɔɔmE =ya kē -dhö, 'ö- dheglu -mE do 'dhö pē 'bhaa -wun 'gü 'kɛE kö =ya ö -ta yö -a -bha, -a -kɔ -dho -mɔa kö -yaan pö -Zlan -dhɔ -ya =zuö' 'gü aa? ¹⁸ Ma 'nē -nu, kö =kun 'ö -dhɔ 'ö 'wo- -kē mE 'ka bhē 'ö kwa -bha -yö -kē -wo -sɛɛbɔ -nu 'kpaan 'ka. -Yö -dho kē -dhɔ giagia 'ö 'wo- 'gü -pē -nu -kē -a 'ka. ¹⁹ Bhii -dhE bhē =nE 'ö 'kwa dho kwa -de dɔ -a -bha =nE 'wun gia- kē -mE -nu -mü kwa 'ka 'ö -zogbandhe dho kē kwa -gɔ -Zlan wö 'dhiö. ²⁰ 'Ö =ya kē =nE kwa =zuö' =ya za -lo kwa tuö, -Zlan -yö =va, 'ö -ziö kwa =zuö' 'gü -wun

-nu -ta; bhii -yö pë 'plɛ -dɔ. ²¹ N dhegluzë -nu, =ya kë =nɛ kwa =zuö' 'yaa za -lo kwa tuö, kö -zo -gban -sü -yö kwa -gɔ -Zlan wö 'dhiö. ²² 'Ö pë 'oo pë 'kwa- -dhɛ -a -gɔ 'ö =ya kë 'ö- nu kwa -dhë bhii kwa- -bha tɔŋg -nu -kun 'ö 'kwa- -dhi -a -dhë -wun -nu -kë. ²³ Tɔŋg bhë 'ö tɔɔ: Kö 'kwa- Gbö Yesu Klito -wun -dhɛ 'wun gia- 'iin kö 'kwa kwa 'ko -nu -dhɔ kë =nɛ -kɔ 'ö- =kaa' tɔŋg 'ka 'ö- dɔa kwa -dhë bhë -a 'dhö. ²⁴ Tɔŋg -nu 'wo go -Zlan 'piö bhë, mɛ 'ö =ya -an 'kun, kö -yö -Zlan -bha 'ka, 'ö -Zlan 'dhö -a -bha 'ka 'pö. Bhii -kɔ bhë =nɛ 'ö 'kwa dho -a dɔa =nɛ -yö kwa 'gü -Zuu 'slööslö =kwaä'.

4

'Wun 'ö -gban -Zuu 'ö go -Zlan 'piö waa- -a mɛ 'ö go Klito yaagümɛ 'piö -an song -bha

¹ Kö =kun 'ö ka -zuu =suu'- 'oo =suu'- -wun -dhɛ 'wun gia-! 'Kɛɛ -kaa -an 'piö -ga 'dhɛ! -An mɛ 'wo -Zlan -bha 'ka giagia 'ka, ka -dho -dhɛ yö -a 'gü. Bhii -Zlan 'dhiwopömɛ -nu =suazë -nu =wa kë =va 'sɛ 'gü. ² -Zuu 'ö go -Zlan 'piö bhë, pë 'ö 'ka dho -a dɔ -a -bha =ga =nɛ: Mɛ 'oo mɛ 'ö Yesu Klito -bha -nu 'kpongtaa mɛbheedhɛ -bun 'gü -sü -wun =blɛɛ' -na bhë -yö 'wun -blɛɛ -Zuu 'ö go -Zlan 'piö -a =kwaä'. ³ 'Kɛɛ mɛ 'oo mɛ 'ö 'yaa Yesu -wun =blɛɛ', 'ö 'wun =blɛɛ -zuu mɛ 'ö yaa 'go -Zlan 'piö -a =kwaä' kö -zuu mɛ bhë, -yö -go Klito yaagümɛ 'ö 'ka- wa -pö ma =nɛ -yö nu -na bhë -a 'piö. -A -de =ya -lo 'kpongtaa zö 'saadhö. ⁴ 'Kɛɛ ka -zë, ma 'në -nu, ka -Zlan -bha 'ka, 'ka 'to -a 'gbee- 'ka -Zlan 'dhiwopömɛ -nu =suazë -nu 'wo bhë -an -ta, bhii -Zuu 'slööslö 'ö -ya -sü 'ka ka 'gü bhë, -a 'pii -yö 'gbee- 'ö =zië' -a mɛ 'ö 'kpongtaa bhë -a -ta. ⁵ Wo -zë, -wo 'kpongtaa 'ö -an =blɛɛ' -wun -nu 'dho 'kpongtaa -wun -nu 'ka; -a -wun 'gü 'ö 'kpongtaamɛ -nu 'wo wo 'to 'to -na -an -bha bhë. ⁶ 'Kɛɛ kwa -zë, kwa -Zlan -bha 'ka. =Ya kë

'dhö kö mε 'ö -Zlan dɔ -yö -dho ö 'to kē kwa -bha. 'Kεε mε 'ö 'yaa -Zlan -bha 'ka 'yaa ö 'to kē kwa -bha. -Dhε bhē =nε 'ö 'wun gia- -Zuu waa- =sua -zuu 'ö -an -bhokoudhε 'dhö -a -bha.

-Zlan -yö -dhɔ -zē

⁷ N dhegluzē -nu, -kwa kwa 'ko -nu -dhɔ kē! Bhii -dhɔ -yö -go -Zlan 'piö, 'ö mε 'oo mε 'ö mε -nu -dhɔ -kē 'ö -Zlan 'kponē 'ka, 'ö -Zlan dɔ. ⁸ Mε 'ö 'yaa mε -nu -dhɔ kē, kö 'yaa -Zlan dɔ bhii -Zlan 'ö tɔɔ -dhɔ =kaa'. ⁹ -Ka -dhε -ga bhē 'dhε! -Zlan -bha -a -dhɔ kē 'ö- wo kwa 'ka bhē, -a -yö sia- -kɔ 'ö mü bhē -kaa -ga bhē: -Yö ö Gbö dosɛn 'ö- -gɔ bhē -a -bɔ 'kpongtaa kö -kēdhösü -yaan kē kwa -gɔ =bɔa' -a -ta -sü 'ka. ¹⁰ 'Yö -dhɔ 'ö 'dhö bhē, -a kē- wo kwa 'ka bhē, yaa kē =nε =dhε 'ö 'kwa- -dhɔ -kē 'ö- 'gü -pē -kē yö kun, 'kεε -ya -sü ö =deē' 'ö -kē ö Gbö nu 'ö- wo slapē 'ka 'ö ga kö -yaan kē -ziö kwa -bha =sɔɔn yaa -nu -ta -pē 'ka bhē -a 'ka. ¹¹ N dhegluzē -nu, =ya kē =nε -Zlan =ya kwa -dhɔ kē =nε -kɔ =suu'- bhē -a 'dhö, -mē -kē 'ö 'kwa kwa 'ko -nu -dhɔ kē =nεε? ¹² Mε gbε yaa -Zlan yö do. 'ö =ya kē =nε 'kwa kwa 'ko -nu -dhɔ kē, -Zlan -dho -ya kwa 'gü, 'ö- -bha -dhɔ -yö -ya kwa 'gü 'fɛfɛdhö. ¹³ Pē 'ö 'kwa- dɔa -bha =nε kwa -Zlan -bha zian -ta 'ö yö -de 'pö 'ö -ya -sü 'ka kwa 'gü bhē 'ö tɔɔ -Zuu 'slööslö 'ö go -a 'piö 'ö- nu kwa -dhē bhē. ¹⁴ Kwa 'yan -yö -dɔ -a -bha 'ö 'kwa- -wun -taɔ -pɛn -na -dhε 'saadhö 'gü =nε kwa Dē (-Zlan) =ya ö Gbö bɔ kö -yaan kē 'kpongtaamε -nu Dhamε 'ka. ¹⁵ Mε 'ö =ya Yesu -bha -kē -Zlan Gbö 'ka -sü -wun -dhε 'wun gia-, 'ö =yaa- -wun =blεε' kö -Zlan -yö -ya -sü 'ka -a 'gü 'ö yö -de 'pö 'ö -Zlan -bha zian -ta. ¹⁶ -Dhɔ 'ö -Zlan -ya -kē kwa 'ka bhē kwa- -dɔ, 'ö 'kwa- -wun -dhε 'wun gia- =li-, -Zlan -yö -dhɔzē; mε 'ö -dhɔ 'dhö -a 'gü kö -yö -klu -sü 'ka -Zlan -bha 'ö -Zlan 'dhö -ya -sü 'ka -a 'gü. ¹⁷ -Dhɔ

-bha -kë 'fɛfɛdhö kwa 'gü -sü 'ö bhë =ya -zɔn =nɛ -zo -gban -sü giagia -yö -dho kë kwa -gɔ -Zlan -bha zakanyi 'ka bhii kwa -bha -tosiadhe 'ö -kë 'kpongtaa zö bhë -yö -bhɔ Yesu Klito -bha -bha. ¹⁸ 'Suö 'yaa -dhɔ 'gü; -dhɔ 'ö -dhɔ giagia 'ka, -yö 'suö -da 'pian 'piö. Pë 'ö -kë mɛ 'ö 'suö 'dhö -a 'gü bhë 'ö -bha -dhɔ kë -sü bhë 'ö 'yaa 'fɛfɛdhö bhë 'ö bhë, bhii 'suö 'ö bhë 'ö tɔɔ 'klobhɔdhe 'piö -pë. ¹⁹ Kwa -zë kwa -Zlan -dhɔ -kë bhii yö =nɛ 'ö kwa -dhɔ -kë 'dhiö -blɛzë 'ka. ²⁰ =Ya kë =nɛ mɛ =yaa -pö ö -Zlan -dhɔ -kë 'kɛɛ kö -yö ö dheglu -san -zë kö =suamɛ -mü -a 'ka; bhii -a dheglu 'ö -yan 'dho -a -bha =yaa -san zë, -Zlan 'ö 'yaa -yö bhë -yö -dho -a -dhɔ kë -kɔklë =ɛ? ²¹ Pë 'ö -kë 'ö Klito -yö tɔng dɔ 'ö bhë. Tɔng bhë -ya -pö: Mɛ 'ö -Zlan -dhɔ -kë, -a =dua' -mü kö -yö ö dheglu -dhɔ kë 'pö.

5

-Tɔmɔdhe 'ö -gban Yesu Klito -bha -kë -Zlan Gbö 'ka -sü -bha

¹ Mɛ 'oo mɛ 'ö Yesu -bha -kë Mɛdhamɛ Klito 'ka -sü -wun -dhe 'wun gia-, kö -yö -Zlan 'kɔnë 'ka. 'Ö mɛ 'oo mɛ 'ö -dhɔ -kë ö Dë 'ka kö -ya -dhɔ -kë mɛ -nu 'wo go Dë 'gü -an 'ka 'pö. ² Pë 'ö 'kwa dho -a dɔ -a -bha =nɛ -Zlan -bha 'në -nu -dhɔ -yö kwa -kë 'ö tɔɔ kwa -dhɔ -kë -Zlan 'ka 'ö 'kwa- -bha tɔng -nu kun. ³ Kë- wo 'dhö bhë 'ö tɔɔ -Zlan -dhɔ kë -sü 'ö bhë, -yö -gban -a -bha tɔng -nu 'kun -sü -bha, 'ö tɔng -nu 'wo bhë 'waa 'gbee-. ⁴ 'Ö tɔɔ -Zlan -bha 'në 'saadhö -kɔ -yö -mɔa kö -yö 'to -a 'gbee- 'ka 'kpongtaapë -nu -ta. Pë 'ö 'kwa dho bɔ -a -ta 'kwaan- 'to -a 'gbee- 'ka 'kpongtaapë -nu -ta 'ö tɔɔ kwa -bha -zo -yö Yesu -bha -sü. ⁵ Mɛ 'ö dho to -a 'gbee- 'ka 'kpongtaapë -nu -ta 'ö tɔɔ mɛ 'ö Yesu -bha -kë -Zlan Gbö 'ka -sü -wun -dhe 'wun gia-.

⁶ Yesu Klito -yö -nu 'kpongtaa; 'kεε -yö -nu 'yi waa-
 fεi -an -wun 'ka. 'Yö nu 'ö- wo 'dhö bhë, yaa nu 'yi -wun
 'sloo 'ka, -yö -nu 'yi waa- fεi -an -wun 'ka. -Zuu 'ö go -Zlan
 'piö bhë -yö 'wun bhë -a =goo- 'ka; 'ö -Zuu -de 'ö bhë, 'ö
 'wun gia- 'ka. ⁷ Bhii 'ö tɔɔ Dë 'dhö, -wo 'dhö waa- -Zuu
 'slööslö -wo 'dhö -yaaga dhang- 'gü, 'ö pë -nu bhë 'wo-
 yö 'wun gia- 'ka. ⁸ -Zuu 'ö go -Zlan 'piö 'dhö, 'yi 'dhö, fεi
 'dhö, -wo -dhö -yaaga 'kpongtaa 'ö pë -nu 'wo bhë 'wo- yö
 'wun gia- 'ka 'pö. 'Kεε kē- wo 'dhö pë -yaaga 'wo bhë, -an
 -wo -ya 'gü do. ⁹ =Dhε 'ö -kē =nε 'kpongtaa zö kwa -we
 mε 'bhee- -nu -bha -tɔmɔdhε -bha bhë kö -yö kē kwa
 'yaan =nε -Zlan -bha -yö -gban -sü 'ka kpinngdhö 'ö =zië'
 mε -nu -bha -ta. Yö =nε 'ö 'wun 'ö -gban ö Gbö -bha 'ö-
 -bha -kē 'wun gia- 'ka -sü -wun =blεε. ¹⁰ =Ya kē 'dhö kö
 mε 'ö =ya -Zlan Gbö -wun -dhε 'wun gia-, kö -tɔmɔdhε
 'ö -gban Yesu -bha -kē -Zlan Gbö 'ka -sü -bha bhë -ya 'gü.
 'Kεε mε 'ö 'yaa -Zlan -wun -dhε 'wun gia-, kö =ya -Zlan
 kē =suamε 'ka, bhii kö 'wun 'ö -Zlan -ya =blεε 'ö -gban -a
 Gbö -bha bhë yaa- -wun -dhε 'wun gia-. ¹¹ -Tɔmɔdhε 'ö
 bhë 'ö tɔɔ: -Zlan =ya kwa gbaa =toëpö -këdhösü 'ka bɔa ö
 Gbö 'gü -sü 'ka. ¹² Mε 'ö =ya -Zlan Gbö 'sü ö -bha 'ka kö
 -këdhösü bhë =yaa- yö. 'Kεε mε 'ö yaa -Zlan Gbö 'sü ö
 -bha 'ka, kö -këdhösü 'ö bhë =ya dha -a -gɔ. ¹³ Pë -nu 'wo
 bhë a- -bεεn ka -dhë 'dhö kö -yö kē ka 'yaan =nε mε 'ö
 'ka -Zlan Gbö -wun -dhε 'wun gia- bhë, =toëpö -këdhösü
 -yö ka -gɔ. ¹⁴ Pë 'ö kwa -zo -gban -Zlan 'piö 'ö tɔɔ =ya
 kē =nε 'kwa pë -dhε -a -gɔ -a -zo 'kun -wun 'ka -yö ö 'to
 -kē kwa -bha. ¹⁵ 'Ö bhii =dhε 'kwa- =tεi' dɔ =nε 'kwa pë
 -dhε -a -gɔ -yö ö 'to -to kwa -bha bhë yö -ga 'ö -kē kwa
 'yaan 'pö =nε =yaa- nu kwa -dhë 'saadhö bhë. ¹⁶ 'Ö =ya kē
 =nε mε =ya ö dheglu yö kö -yö =sɔɔn yaa 'gü, 'iin kö =sɔɔn
 yaa 'ö- 'gü bhë, yaa 'dho dho -a 'ka ga 'gü, kö -yö =bhεa' -a
 -wun 'gü; -a dheglu 'ö 'dhö bhë, -Zlan -yö -dho -këdhösü

nu -a -dhë. A- -pö 'wun bhë -yö -gban mε -nu 'ö -an -bha =sɔɔn yaa 'ka 'dho dho -an 'ka gamε -nu -bha -yadhε -bha bhë -an -bha. 'Kεε =sɔɔn yaa do 'ö kwa 'yaan 'ö =ya kë 'ö -mɔ -a -bha 'ö dho mε 'ka ga 'gü bhë 'yaa -mü 'a- pö 'ka =bhεa' -a -wun 'gü. ¹⁷ 'Wun =zaa' -sü 'saadhö 'ö tɔɔ =sɔɔn yaa. =εε, 'kεε -a 'bhaa -nu -wo mü 'pö 'ö 'wo dho mε 'ka ga 'gü. ¹⁸ Kwa gia- kwa- -dɔ =nε mε 'ö -Zlan 'kɔnë 'ka 'yaa 'dho =sɔɔn yaa kë -sü 'ka 'dhiö, 'ö tɔɔ -Zlan Gbö -ya 'piö -kplawo. =Ya kë 'dhö kö kēpēyaame yaa 'dhö -mɔa -bha -yö pē yaa kaa. ¹⁹ Kwa- -dɔ =nε kwa -Zlan -bha 'ka, 'ö 'kpongtaadhε 'dhö dü -kɔ =löö. ²⁰ Kwa- -dɔ 'pö =nε -Zlan -yö ö Gbö bɔ kö -yaan kwa 'yan 'dhi 'po, kö -Zlan 'ö 'wun gia- 'ka bhë, 'kwaan- -a dɔ. 'Ö -Zlan 'ö 'wun gia- 'ö 'dhö -a 'ka bhë 'kwa -klu -sü 'ka -a -bha =bɔa' -a Gbö Yesu Klito -ta -sü 'ka. Yö =nε 'ö tɔɔ -Zlan gia- 'ö =toēpö -kēdhösü 'dhö -a -gɔ. ²¹ Ma 'në -nu, gbapë -nu ('ö 'ka -an -ga -na bhë, 'waa -Zlan gia- 'ka), -ka 'kan -an -bha!

'WUN SĚ -NAŌ 'SĚĚDHĚ

Dan: 'WUN SĚ -NAŌ 'SĚĚDHĚ New Testament

copyright © 1991 Wycliffe Bible Translators, Inc.

Language: Dan

Dialect: Western

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 1 Jun 2022

74f67de7-5f93-5988-92e9-b1a45247636e